

续资治通鉴长编

续资治通鉴长编

續資治通鑑長編卷二百九十七

宋 李燾 撰

神宗

元豐二年三月庚午朔董戡遣經沁伊達本凌節等來貢方物上問所以來之意對曰董戡蒙恩許貢故遣使來謝上慰撫之皆歡呼舞拜 權監察御史裏行舒亶爲集賢校理以上批宣優于辭學詳于吏治自丞屬憲府能以先後左右朝廷政事爲己職責故也 詔錢藻且權開封府以許將連太學獄事而御史臺鞫治多用開封府吏也 八月丙辰許將責 權御史中丞蔡確言畿內及諸路闕雨宿種未長重虞疾疫陛下賑卹窮乏詔書數下仁民之慮可謂至矣臣愚竊謂四方犴獄宜更澄察

決滯理冤足召協氣乞詔畿內提舉司諸路轉運或提
舉司委官與提點諸縣鎮及提點刑獄官巡按闕雨州
縣督治未結絕公事有涉枉濫或無故淹延者並申理
決遣劾官吏以聞知諫院李定言京東河北饑青齊滄
棣尤甚陛下已敕有司賑救貧乏租稅欠負例皆展閣
減價出粟支借種錢籍錄饑羸給以口食尙聞民不安
居漸有流散乞戒監司檢察州縣若賑救不如法致有
逃死以戶口多少等第黜罰知諫院黃履亦言知青州
龔鼎臣知滄州張問性雖厚重而短于應務不足以賑
乏紓急乞別選能者易鼎臣問以他郡皆不行此朱本削
此三事
詔兩浙路災傷民貧戶絕田產價錢者展限半年輸
官初本路乞展限一年而司農寺以爲太寬也賜辰

州捕獠賊兵丁特支錢

辛未詔河東定奪吉伯溝地界毋得張皇或致生事候
究治得實具奏聽旨以管勾緣邊安撫司王崇拯言差
官定奪滋長狡計宜但戒地分巡檢毋得侵越耕種而
已上以其言爲然故有是詔 又詔開封府界僧寺旅
寄棺柩貧不能葬歲久暴露其令逐縣度官不毛地三
五頃聽人安葬無主者官爲瘞之民願得錢者官出錢
貸之每喪毋過二千勿收息詔提舉常平等事陳向主
其事以向建言故也後向言在京四禪院均定地分葬
遺骸天禧中有敕書給左藏庫錢後因臣僚奏請裁減
事遂不行今乞以戶絕動用錢給瘞埋之費至六月向
又乞選舉僧守護量立恩例並從之葬及三千人以上

度僧一人三年與紫衣有紫衣與師號更令管勾三年

願再住者準此向桐廬人也

張舜民云云可考新舊紀並書詔畿內貧民不能葬

者給地貸以錢無主者瘞之

癸酉賜梓州路轉運司度僧牒百修遂戎瀘州城

丁丑上批前內侍省高班梁堅坐監嵩慶陵自盜賊貸

死編管襄州該恩已放逐便今貧窶無所歸內臣執事

兩省更無他所安排可與一內侍省把門內品遂為後

苑散內品環慶路經略司俞充言蕃部昌甯為西界

守領使詐歸投來刺邊事續來理索并熟戶蕃部蘇尼

亦入漢界刺事若依法處置昌甯恐生其疑乞牒還西

界蘇尼乞刺配近襄州軍上批蘇尼有死罪二一犯十

惡法當緣坐今幸敗獲所宜明正典刑不知有何情理

可矜特爲末減昌甯雖本西人自是入中國刺事理亦
不可牒還縱令遣回未知于夏人疑我之心如何可解
顯亦全無意謂可令依法施行其捕獲蕃官速依條酬
獎節略蘇尼等情欸牒鄜延路令轉牒宥州取問首領
擅遣人入中國刺事人罪嚴加誡斷遂斬蘇尼而昌甯
處死 上批大理寺長貳丞主簿家屬旣不在治所如
遇休假宜止各輪一員在寺餘歸休沐庶制可經久人
無憚倦其著爲令 三司言會計河北東路熙甯十年
收支實闕錢帛等比轉運副使陳知儉判官汪輔之元
奏之數少七十三萬餘緡知儉等誠不職乞降黜以誠
諸路詔提舉司劾罪奏之輔之坐杖七十知儉杖六十
各該去官詔各特罰銅二十斤 知都水監丞范子淵

言修黃河南岸治水隄乞給人兵物料緡錢詔發卒三千人給官莊司熟藥所錢共三萬緡仍特賜公用錢二百緡提舉河北糴便糧草王子淵言糴緣邊軍儲皆商人入中歲小不登必邀厚價故設內地州縣寄糴之法以權重輕自內地用御河船運至緣邊且以熙甯八年言之綱船三百用工幾二千人所運不及八萬石計綱船兵工約一斗已費錢七十矣若僦私船百里之地斗才一錢三分至五分率以千里之遠計之猶可省綱船所費之半宜雇客船便下三司議三司請留綱船二百二十艘應副船運不足卽如子淵議從之令歲終具和雇私船所省錢數以聞

戊寅錄北界人程詮程岳爲三班借職程景三班差使

李弼送襄州賜地二頃月支錢千米一石三年詮等嘗
爲邊人刺北事又嘗告獲姦細事覺來歸定州安撫使
乞推恩故也

庚辰御集英殿策禮部進士

舊紀具載策題

禮賓使嘉州刺

史高公繪爲羣牧都監文思副使高遵路管勾景靈宮
公繪以皇太后從子遵路以從叔也

辛巳詔今歲特奏名明法改應新科明法人試大義三
道又詔京朝官選人班行所試經書律令大義斷案
上等三人循一資中等三十四人不依名次注官下等
七十人注官

壬午策特奏名進士又策武舉進士刑部言祕書省

正字王鞏坐嘗借趙居兵書當杖八十追兩官勒停已

敘祕書省正字今又及三暮當敘太常寺太祝上批王
鞏所犯交結巨惡情理極重緣當日元勘不盡故案法
得罪至輕可更展三期與敘元官 詔發壯役兵二千
京東廂軍一千濱棣州修城揀中崇勝兵五指揮並赴
洛口工役

癸未御集英殿試諸科新科明法 龍圖閣直學士知
渭州蔡延慶權知開封府延慶初得安南九軍法讀之
謂諸將曰漢蕃兵馬未整幸今無事可依此團結以備
調發乃以正兵弓箭手人馬團爲九將合百隊分四部
爲左右前後而隊有駐戰拓騎之別步騎器械每將皆
同又以蕃兵人馬爲引隊各隨所近分隸諸將每將之
數不及正兵之半所以制之也處老弱於城砦使漢蕃

不相雜所以防其變也爲書上之會鄜延路亦分畫兵將朝廷以兩路所奏遣徐禧議定禧奏宜依鄜延奏從事乃下諸路有不同者具析以聞延慶條鄜延所奏未便者具上且言不敢附下以孤委任上是延慶以禧爲

不然乃召延慶

神宗初以延慶分畫兵將爲是後乃有詔褒獎徐禧且命禧代延慶則似禧爲

是也延慶傳云上以禧爲不然當考褒獎禧詔在此月丙戌御集四月十八日元年七月辛卯更詳之

龍圖閣待制知秦州呂大防知審刑院御史舒亶言大防果於立異足動流俗使在朝廷於聖政有損無益乞

與一在外差遣不聽

詔聞鄜延路緣邊蕃部有積年

借貸錢穀主事催督迫急貧下戶艱于送納甚有自盡及亡出外界者可更展限半年環慶路準此賜董戩進奉馬四百六十三匹價錢一萬一千二百緡銀綵各

千對衣金帶銀器衣著等補進奉大首領經沁伊達木
凌節珍州刺史劉勇丹濟古扶州刺史餘有官者遷一
資未命者補職名有差歲增大首領大綵十七匹小首
領五匹散茶各十斤以經制熙河邊防財用李憲言經
沁伊達木凌節敘述和斷之勞故也

回賜馬價用密院
時政記增入密記

卻不書銀
綵當考

閣門言同天節臣僚罷散道場賜御筵乞

依燕式賜花從之

太常博士周直儒等言國信一路

郡縣驛亭陳設什物以致樂器等故敝乞新之詔自京

令國信所緣路委監司一員先事點檢完治

秦鳳路

經略使呂大防言階州漢蕃戶獻納并根括田五百二

十頃可募弓箭手詔緣邊法人給地兩頃

丙戌龍圖閣直學士知成都劉庠進一官知秦州 太

子中允集賢校理知諫院徐禧爲右正言直龍圖閣權

發遣渭州賜緋章服其計議措置邊防事如故

計議措置如故

據禧本傳

初陝西緣邊兵馬蕃弓箭手與漢兵各自爲軍每

戰多以蕃部爲前鋒而漢兵守城伺便利後出不分戰

守每一路以數將通領之呂惠卿帥鄜延以爲調發不

能速集始變舊法雜漢蕃兵團結分戰守每五千人隨

屯置將且條約以上邊人及議者多言其不便上頗采

惠卿議欲推其法于諸路故遣禧往計議禧先具環慶

法上之遣官措置涇原而涇原帥蔡延慶以爲不可朝

廷亦是之并難禧環慶法禧厯疏涇原法疏略參錯圖

其狀別爲法以奏且言環慶法不可改上與惠卿詔曰

徐禧論措置析將事惻怛慷慨謀國不顧已令代延慶

帥涇原卿宜勉終之異日爲一代良臣矣

元年六月丙寅初遣禧計

議七月辛卯有詔付禧及諸路是年三月癸未蔡延慶云云可考

太原府路走馬承

受全惟幾言馬遞鋪兵轉送朝廷邊機遞角檐擎使命行李并諸般綱運軍器材料衣賜絹布之類略無休息雇賃脚乘倍費錢數窮困凍餒乞加寬卹上批久聞鋪兵艱勤之狀深可傷惻今因惟幾到闕面審其實具道逐人衣不庇體食不充口家人則以不任寒凍多埋覆于溫灰之中以苟活生命窮極如此亟宜拯卹可委陳安石速具措置以聞後安石言欲乞應軍器及材料并衣賜凡綱運並差廂軍搬運日支口食如闕卽和雇又軍器材料其間有不適用及粗重枉破脚乘欲乞並委所屬專差官相驗堪好方得起發應合變造成樸並令

要用去處先造樣一二件關送起發州軍依樣計置應副如此減得脚乘兼便于津般詔軍器監相度以聞本監言如此誠便並從之河北緣邊安撫司言雄州兩輪戶避北界差夫及科桩木修涿州城各攜家屬來近本州并關城居止上批兩輪戶避役逃移不免失所其給口食賑卹候北界科役少息諭令復業

戊子管勾廣南西路常平等事劉誼言邕州官舍民居悉以茅覆兼兵火之後邊城樓櫓未備乞集陶匠燒瓦運宜州木板置溪洞竹蓋公私屋宇庶絕火患從之詔誼經畫施行轉運司協力應副上批河東路見運物材就緣邊造軍器顯爲迂費張皇可令軍器監速罷之廣西經略司言延眾鎮右千牛衛將軍張智常誘致

九道白衣富雅州李聚明等內附詔遷智常右監門衛將軍

庚寅詔入內東頭供奉官宋用臣都大提舉導洛通汴前差盧秉罷勿遣初去年五月西頭供奉官張從惠言汴河口歲歲閉塞又修隄防勞費一歲通漕纔二百餘日往時數有人建議引洛水入汴患黃河嚙廣武山須鑿山嶺十五丈至十丈以通汴渠功大不可爲自去年七月黃河暴漲異于常年水落而河稍北去距廣武山麓有七里遠者退灘高闊可鑿爲渠引水入汴爲萬世之利知孟州河陰縣鄭佖亦以爲言時范子淵知都水監丞畫十利以獻歲省開塞汴口工費一也黃河不注京城省防河勞費二也汴隄無衝決之虞三也舟無激

射覆溺之憂四也人命無非橫損失五也四時通漕六也京洛與東南百貨交通七也歲免河水不應妨阻漕運八也江淮漕船免爲舟卒鑄鑿沉溺以盜取官物又可減沂流牽挽人夫九也沿汴巡河使臣兵卒薪槁皆可裁省十也又言汜水出王仙山索水出嵩渚山亦可引以入汴合三水積其廣深得二千一百三十六尺視今汴流尙贏九百七十四尺以河洛湍緩不同得其贏餘可以相補懼不足則旁隄爲塘滲取河水每百里置水腫一以限水勢隄兩旁溝湖陂濬皆可引以爲助禁伊洛上源私取水者大約汴舟重載入水不過四尺今深五尺可濟漕運起鞏縣神尾山至土家隄築大隄四十七里以捍大河起沙谷至河陰縣十里店穿渠五十